

Ruth

Angka Ruth-akert

Angka nhenhan alakenh aynteyel

Angka nhayman arelh anyent-akert itnan Ruth. Ra awank-akerr anenh. Ranap apmer ingwer-areny, apmer Moab-areny. Anherrikw Ruth-kenh ra arelh Jew itnan Naomi. Anewikw Naomi-kenh itnan Elimelek. Ratherran alerikw atherr-akert itnan Mahlon Kilion-atherr. Rernemap tawen Bethlehem-itwek anenh Judah-ampeny-itwel.

Ingwer-ingweran apmer ra arlenyerrek, amern lyapey-angenh-anem, arrangkw. Ingkerran angwayak-anemerrek. Kel Naomi Elimelek-then alerikw-atherr-then rernem apmer Moab-itwek amernek aney-alpek. Apmer ikwer-itwel youngfeller atherr arelh atherr Moab-areny-atherr-then itengerrek-anem. Mahlon ra arelh Ruth itengerrek, Kilion ran arelh Orpah itengerrekarl.

Ikwer-penh ingwer-ingweran Naomi-kenh anewikw ikwerenh ahaperrek-anem. Aherrety 10-penhan ampatherr ratherr ahaperrek arrpemar.

Naomi ran amperrngerremel-anem anenh, rap iterrek, angkep alpetyek apmer aknganenty-warl Bethlehem-warl. Rap Ruth Orpah-then renh-atherr ilek, arteny anayntetyek aknganenty ikwer-atherrenh-itwek Moab-itwek. Ruth-elan tyernek, "Ayengan ilkelheyel,

ngkweng-angkwarr alhetyek.” Anherrenheng-atherr ratherr alpek apmer Bethlehem-warlanem. Akngeyel renh-atherr mwerr-angkwarr arntarnt-arek. Apmer ikwer-itwel Ruth-an artwa anyent itengerrek itnan Boaz. Ruth ra avey akely-anem atnyenek itnan Obed.

Ingwer-ingweran Obed ra alerikw anyent atnyenek itnan Jesse. Jesse rap alerikw anyent atnyenek itnan David. David ra atyetyart ilkwa anenh apmer Israel-itwel.

Alakenh-kety angka nhaym Ruth-akert impe-narl Jew-rnemek.

*Rernem aney-alpeyel apmer ingwer-itwel,
angwayakarlap rerneman*

¹⁻² Awank-akerr artwa anyent anenh itnan Elimelek. Rap tawen Bethlehem-itwel anenh Judah-ampeny-itwel. Ranap Ephrath-kenh-antey. Anewikw ikwerenh itnan Naomi. Youngfella ikwer-atherrenh itna Mahlon-then Kilion-then.

Ingwer-ingweran apmer ra arlenyerrek-anem. Elimelek-rnem angwayak anenh, rernemap Bethlehem iwerl-alhek, apmer ingwer-itwel Moab-itwel aney-alpek-anem.

³ Ingwer-ingweran artwamp ahaperrek-anem. Anewikw Naomi ra inpert-anemerrek, youngfella alhamp atherr-itwel anerl-anemel.

⁴ Ratherran arelh atherr-then itengerrek Moab-areny atherr. Mahlon ra arelh Ruth-then itengerrek, Kilion ran arelh Orpah-then itengerrekarl. Rernemap arleng-alenty anenh apmer ikwer-itwel, aherrety 10-ek-atwety apek.

⁵ Ikwer-penhan Naomi ra areperrk-anemerrek, ampikw atherrarl ahaperrek. Rap amperrngerremel-anem anenh, ranap anenh-antey apmer ikwer-itwel.

Anherrenheng-atherr angkep alpeyel

⁶ Naomi rarl Moab-itwel anenheng-arey, ra awek, INGKARTelarl ikwerenh-rnem arntarnt-arenh apmer Judah-itwel. Kwaty ilkwa rntwey-alhek, amern-rnem lyapelhelek-anem. Ingkerrelan inkwerelhemel amern-rnem akarrelenh. Naomi ra iterrek, Moab iwerl-alhetyek, angkep-antey apmer Judah-itwel aney-alpetyek. Anherrikw ikwerenh-atherran iterrek, ilkwatherr alpetyek. ⁷ Rernemap anperl-alhek, iwerrel-antey alhemel.

⁸ Naomi anherrikw-atherr-warl-anem angkek, “Mpwelan alpetyek, amengkw mpwel-kenh-itwel anayntetyek. INGKARTel mpwelenh arntarnt-aretyek mwerr-angkwarr, mpwelarl ayenh arntarnt-arenh-apeny ampa atyenh-atherr-then. ⁹ Rap anthem anewengk ingwer-atherr-anem, mpwelenh irrngerney-anthetyek.”

Kel ra renh-atherr arrwantyek-anem, anperl-alhetyek-athath. Ratherrap artnenh artewentyel, ¹⁰ alakenh angkemel, “Mentyaw! Ayla ngkweng-angkwarr alpetyek, ngkwenh-rnem-itwel aney-alpetyek.”

¹¹ Naomi ranap angkek ikwer-atherr, “Anherrey-atherray, mpwel angkep alpetyek apmer mpwel-kenh-warl-anem. Ilekek mpwel apenteyel-antey? Nthakenh atha ampa ingwer atherr atnyeney-angenh, mpwel

itengerretyek, arrangkw. ¹² Ya, apmer-warl-anem alpetyek. Ayengan arelhampw-anem, nthakenh itengerrey-angenh-anem. Anherrey-atherray, arwa angkeyel-anem. Ayeng apek lyert ingwel artwitwel intengerrem, ikwerpenh ingwer-ingweran away atherr-anem atnyenemel. Nthakenh-anem irrem? ¹³ Mpwelan nthakenh mpwelhey-angenh away ikweratherr arrpemar, ratherrarl alkenherretyek! Arrangkw wenh, alakenh-weny! Mpwel amperrngerremel anerl-anekerr inpert-antey arleng-alenty. Ya, rlterrk-anem aynteyel mpwelek. Rlterrk innganemar aynteyel atyeng. INGKARTelan ayenh artewentyel irrwerneyel, amperrngelemel.”

¹⁴ Rerneman artnek arrpemar. Orpah ran anherrikw ikwerenh arrwantyek-anem, rap apmer-warl-anem anperl-alhek. Ruth-anap ilkelhey-angenharl, Naomi iwerlelpetyek, rap renh antwerrkenh-antey.

¹⁵ Naomi-an ikwer angkek, “Nhak araw. Arn-tengengkw ikwerenh-rnem-warl alpeyel-anem, rap altyerr ikwerenh-rnem-kenh-warl alpeyel. Ngan ilkwatherr alpa.”

¹⁶ Ruth-elanap tyernek, “Ayenh thweney-angenh ngkweng-kety. Ayenh iley-angenh, ngenh apentey-angenharl. Ayeng ngkweng-angkwarr alpetyek. Ngan apmer ingwer-warl alhem, ayengap alhem arrpemar. Ngan apmer ingwer-itwel anem, ayengap anem arrpemar. Ngkwenh-rneman atyenh-rnem-anem aneyel. Athap Akngey apentetyek, ntwarl renh apenteyel-apeny. ¹⁷ Alakenhaym aylanth iteng

anerl-aneyenh, aylanthap apmer ikwer-itwel ilweyenh. Ingwer-ingweran rernem ayenh akwerneyenh apmer ikwer-itwel. Inngarl ayeng angkeyel, INGKARTelarl aweyel-kety. Atha irrtysterremel ileyel apek, menty ra ayenh artewentyel atwetyek. Ayengan ngkweng-itwel anayntetyek ilwentyek-atwety.”

18 Naomi ra iterl-arek-anem, inngarlap Ruth iterrek, ikwer-angkwarr alpetyek, rap akeleyt-anemerrek.

19 Kel anherrenheng-atherr alhenh-antey Bethlehem-warl. Ratherrarl apmer ikwer-itwel arremerey-alhek, akngerran apateyelppek-anem. Arelh apmer ikwer-areny-rnemel ayernerrek, “Inngarl Naomi yanhan, anwekantherr-warl apey-alpeyel?”

20 Naomi arrer-anem apetyek, rap angkek, “Ayenh *Naomi* antwey-angenh-anem. Itna Naomi mean-errem 'irngerney'. Ayenganap inkwerelhey-angenh-anem aneyel. Ayenh *Mara*-anem antwey. Itna Mara mean-erreyel 'amperng'. Akngey Atyetyart Ilkwa Ingkerrenhekel ayenh amperrngel-anthek. 21 Atharl apmer nhenh iwerl-alhek awank-akerr, atha ilek-ilek atnyenek. Aleyan INGKARTel ayenh arrangkw akngey-alpek. Ilekek ayenh *Naomi* antweyel? Akngey Atyetyart Ilkwa Ingkerrenhel atnert ayenh apmwelek. Ayengan amperrngerreyel-antey.”

22 Kel alakenhaym ra ayntenh. Anherrenheng-atherr Naomi-then Ruth Moab-areny-then ratherr Bethlehem-itwel aney-alpek. Ikwereng-

arey apmer ikwer-areny-rnemel amern antywer
parley akelp-akemel akarrelenh-anem.

2

*Ruth-el ntang akarreleyel
Boaz-kenh katen-itwel*

¹ Artwa anyentan Bethlehem-itwel anenh itnan Boaz. Ranap Naomi-wenh anewikwek Elimelekek apelty anenh, rap ilek-ilek atnyenenh man akngerr-then.

² Ingwer-ingweran Ruth ra angkek Naomi-ek, “Anherreyay, mwerrang ayeng yanh-rnem-warl alhem, rernemarl amern antywer parley akeyel-warl? Ingwerenty apek amperrngerrem atyeng, rap menty atha ntang akwetyetyek ingkernthey.”

Naomi-el tyerne, “Mwerr alheyaw!” ³ Ruth alhek-anem katen ikwer-warl, warrkenh-rnemelarl amern akenh-warl. Rap warrkenh-rnem apentenh, rernemarl amern-rnem akenh. Ra ntang akarrelenh, warrkenh-rnemelarl iwerl-alhek. Katen artwa Boaz-kenh anenh, Elimelekek apelty-kenh, Ruth-elap iterl-arey-angenh-anem. Rap apal ntang akarrelenh katen ikwerenh-itwel.

⁴ Artwa Boaz ran Bethlehem-they aremerreylpek katen ikwerenh-itwel-anem, rap angkek warrkenh ikwerenh-rnemek apmelerr-angkwarr, “INGKARTel arrenhantherrenh arntarnt-aretyek!”

Rerneman tyerne, “INGKARTel ngenh arntarnt-aretyek arrpemar!”

⁵ Boaz ra atyetyart akelyek angkek, “Arelh yanh ran angwenh-kenh?”

⁶ Atyetyart akelyel tyerneke, “Arelh yanh ra Moab-areny, rap ilkwatherr Naomi-itwel apeyalpek. ⁷ Ra ayenh ayerneke, ‘Mwerrang atha warrkenh-rnem apentem, ntang akarreletyek, rernemarl iwerl-alhem?’ Kel atha renh menty arek. Ingwepenh-antey ra nhenh-warl apetyek, rap pantey warrkerrenh. Ra alyepant ltyerrenh lywenty-itwel.”

⁸ Boaz ran alhek Ruth-warl, rap angkek, “Arelhay, atyeng awelhetyek. Artewenty iterrey-angenh. Nga nhenh-itwel anemer, ntang akarrelemel katen atyenh-itwel. Katen ingwerentyak-kenh-warl alhey-angenh. Arelh warrkenh atyenh-rnemant ntwa apentetyek. ⁹ Nhak araw, artwa warrkenh-rnemelarl amern antywer parley akeyel-warl, arelh warrkenh-rnemelarl akarreleyel-warl. Mwerr ntwan ingkern-theyarl apentetyek. Atha kel artwa warrkenh-rnem ilek, ‘Arelh renh menty ipmenharey!’ Nga angkethakwerrem apek, mwerr antywetyek tyampet yanh-penh. Artwernemel kwaty tyampet-warl aleth intem thelem.”

¹⁰ Ruth-el awek, rap ahern-warl kwernerrek. Ra angkek Boaz-ek, “Alethang ayengan, apmer ingwer-areny. Ilekek nga atham-athamel atyeng angkeyel?”

¹¹ Ra tyerneke, “Akngrerr ingwer-rnemel ayenh ilenh ngkweng-akert. Ngan inpert-anemerrek, ntwap anherrengkw Naomi arntarnt-arenh arraty-angkwarr. Ntwap aynengkw-then

amengkw-then iwerl-alhek apmer ngkwenh-then, ngan apmer ingwer-itwel-anem aney-alpek. Anenhantherrenh ntwa iterl-arey-angenh-tangkwel. ¹² INGKARTan inkwerelheyel ngkweng, ntwarl anherrengkw arntarnt-arenh. Ngap apetyek ikwer-warl-athek. Ran Akngey aneyel Israel-kenh-rnemek, rap ngenh-anem arntarnt-arayntetyek.”

¹³ Ruth angkek ikwerek, “Ya, atyetyart. Ngan mwerr atyeng aneyel, ngap mwerr-angkwarr angkeyel atyeng. Ayengan iterreyel, nga alakenh apek anayntem atyeng. Ayengan arelh warrkenh ngkwenh-wenyarl, ntwanap ayenh arntarnt-areyel.”

¹⁴ Ingkern ampepel rernem akarrerrek, amern arlkwetyek. Boaz angkek Ruth ikwer, “Amern-warl apetyetyek. Nhanyem amern rtamp. Ltye-warl pwerlp arrernemel arlkwetyek.”

Kel Ruth ra warrkenh-rnem-itwel arrernelhek, amern arlkwetyek. Boaz-el renh antheke amern ntang ampeng rwepenh. Ruth-el arlkwek atnertengek-atwety. Rap ntang ampeny awakek, ingwer-ingwerant arlkwetyek.

¹⁵ Ikwer-penhan Ruth rtnerl-alhemel alpek warrk-warl angkep-antey. Boaz ra artwa warrkenh-rnem ilantheke, “Menty arelh yanel ntang akngerr akwetyetyek ampepel, arrantherrarl antywer parley akarrelek-itwel. Renh iltey-angenh-anem. ¹⁶ Arrantherr ntang aytnelheleyek akwerr-warl, ra akwetyetyek. Arrngert angkey-angenh.”

¹⁷ Alakenhaym Ruth-el ntang akwetyenh ingkenyarl aylpenhetyek-atwety. Rap ntang

akatwek-anem ilpemel, akngerr innga, ar-rernemel yakweth ilkwewarl. ¹⁸ Ra yakweth inek, apmer-warl-anem akngetyemel, anherrikw ikwerenhek lwewarrernetyek. Naomi-elan arek, rarl ntang akngerr akngetyek. Ruth-elap renh anthek amern ntang ampeng rwepenh.

¹⁹ Naomi-el ayerneke, "Nthenh-itwel ntwang ntang akngerr akwetyerl-alpek? Katen angwenh-kenh-itwel nga warrkerrenh? Artwa yanhan atham-atham ngkweng anenh. Athan Akngey ikwer katy ayernem, mwerr ikwer anetyek arrpemar, renh irrngerney-anthetyek."

Ruth-elan angka ikwer ilek artwakert, katen antywer parley-akertek-artwewarl. Rap angkek, "Artwa katenek-artwez itnan Boaz."

²⁰ Naomi-el apateyelpemel awek, rap angkek, "INGKARTel Boaz renh irrngerney-anthetyek!" INKART ra aylenhant h iwerl-alhey-angenh, rap aylekanth iterreyel-antey, anew aylekanth-kenh-atherrek-then! Artwa yanh Boaz ra akwerrk anewaty-kenh Elimelek-kenh! Ranap artwa arelh inpert arntarnt-arey-angker anwekantherrenh-angkwarr!"

²¹ Ruth angkek-anem, "Yew-yew, artwel ayenh ilek, warrkenh ikwerenh-rnem-itwel pweyterreyek, ntang akwety-ayntetyek. Ra angkek atyeng arrpemar, 'Mwerr ntwang nhenh-itwel akwety-ayntetyek, antywer parley ywerreyek-atwety.'" "

²² Naomi-el tyerneke-anem, "Ya, mwerr ntwang ntang akwety-ayntetyek arelh warrkenh-rnem-itwel Boaz-kenh katen-itwel. Katen ingwerentyak-kenh-itwel artwernemel ngenh apmwangkwarr inekerr."

²³ Kel alakenh-anyem Ruth ran arrer-apeny-antey anenh arelh warrkenh Boaz-kenh-rnemek. Ra ntang akwetyenh-antey, rernem antywer parley akemel ipmelhetyek-atwety antywer weyt-then. Ruth rap anenh-antey anherrikw ikwerenh-itwel Naomi-itwel.

3

Naomi-el artwa Ruth-ek rlwaneyel

¹ Wik irrpetyap-penhan Naomi angkek Ruth-ek, "Anherreyay, atha artwa ngkweng inetyek, ngenh arntarnt-aretyek. ² Artwa yanh Boaz ra akwerrk anewaty-kenh. Nga warrkerrenh arelh warrkenh ikwerenh-rnem-kenh-itwel. Lyert ingwel ra warrkerrerl-aneyenh apmer aterterr-itwel, rernemarl ntang ilpeyel-itwel. ³ Nga pwerlperretyek-tangkwel. Apernelhetyek-anem anter mwerr-angker inteyel-akertel. Ankwa mwerr-angkerel aylpetyek. Lyert ingwel nga alhetyek apmer aterterr yanh-warl, Boaz-kety arlengk-iwelhemel-tangkwel. Mpelhey-tangkwel, ra atnertengerremel anetyek-atwety. ⁴ Mwerranty awelhetyek! Anwekantherrenh-angkwarr alakenh aynteyel! Ntwa renh mwerranty arntarnt-aretyek, ra rtnerl-alhetyek. Renh arntarnt-aretyek, rarl panty ikwerenh arlpimpeletyek, ra ankwayntetyek. Mpelhey-tangkwel, rarl apelp aynteyelek. Ikwer-warl-anem alhey, panty akentewemel ingkety-angkwarr. Nga ankwayntemel arrernelhey ingkety-angkwarr. Ran alerl atyekerretyek. Ra iterl-areyel, anwekantherrenh-angkwarr

alakenh aynteyel. Rap ngenh ilem, nthakenh-anem irrem nga.”

⁵ Ruth-el tyernek, “Yew. Atha mpwarem, ntwarl ayenh ileyel-angkwarr.” ⁶ Rap apmer aterterr-warl alhek, rernemarl ntang ilpenh-warl. Rap iylypareth mpwarek, anherrikw ikw-erenhelarl ilenh-angkwarr.

⁷ Amern arlkwenty-penh Boaz irrngerney-anem awelhenh, rap arrernelhek, rarl ntang mpwer tywenek-itwel. Ruth akater alhek ikwer-warl, rap panty akentewek ingkety-angkwarr. Ra arrernelhemel ayntek ingkety ikwerenh arrerenty-itwel. ⁸ Ampepenyel Boaz arwapeny atyekerrek, rap apateyelpék-anem. Rap angapety-iwelhemel arek, “Pwertay, arelh anyent aynteyel-kety!”

⁹ Ra ayernek, “Angwenh nganay?”

Ruth-el tyernek, “Atyetyartay, ayengaw Ruth. Ngan akwerrk Naomi-kenh anewikw-kenh aneyel. Ntwa ayenh arntarnt-aretyek. Ngan artwa arelh inpert arntarnt-arey-angker. Alakenh atha iterl-areyel, ingwer-ingwer nga atyeng-itwel itengerretyek, ayenh arntarnt-aremel.”

¹⁰ Boaz-el tyernek, “Atha INGKART katy ay-ernem ngkweng, mwerr anetyek ngkweng inkw-erelhemel. Nga athamerrenh anherrengkw ngkwenhek, mwerr-angkwarr arntarnt-aremel. Atyenganap nga inngarl-anem athamerreyel. Ayengan ngkweng-they arrwekel! Youngfella akngerr aneyel, ingwer-rneman man akngerr-akert, ingwer-rneman arrangkwarl. Ntwanap renh-rnem mentyarl arenh, ntwap ayenhan

rlwanek! ¹¹ Atererrey-angenh. Athan mpwarem, ntwarl ayerneyel-angkwarr. Ingkerrenh nhenh-arenyel iterl-areyel, ngarl arelh mwerrangker. ¹² Yew, ayeng akwerrk Naomi-kenh anewikw-kenh aneyel. Ikwer-artwey anyent ngkweng itengerremer. Artwa ingweran apek ngkweng itengerremer ayeng-mernt? Kakey atyenh apek? Remernt apek ngkweng itengerrem, ngenh arntarnt-aremel? ¹³ Nhenh-itweltangkwek nga anayntem. Aherlkenhey-alhetyek-athath akwentetyek. Anamerl apmer-warl-anem alpetyek, ingwerentyel arekerr. Ingwepenh ayengan alhem, artwa ikwer angketyek. Ra iterrem apek, ngkweng-itwel itengerretyek, kel mwerr. Arrangkw apek. Kel ayengan inkw-erelhemel ngkweng-itwel itengerretyek, ngenh arntarnt-arayntetyek. Alakenh ayeng angkeyel, INGKARTelarl aweyel-kety. Innga wenh atha mpwarem, atharl ileyel-angkwarr. Nhenh-itweltangkwek anayntetyek.

¹⁴ Kel Ruth ra ayntek ingkety Boaz-itwel arrerenty aherlketyek-atwety. Rap akwentek aherlkenhey-alhetyek-athath, ingwerentyel renh alhengk-arekerr.

¹⁵ Ingwepenh-antey Boaz-an ikwer angkek, "Panty ngkwenh iney-alhetyek, nhenh-itwel arlpimpelemel." Ruth-el panty arlpimpelek, rarl ilek-angkwarr. Artwel ntang akgerr thelek panty-warl arertnemel. Awerr-kety ra irrwerlelek, Ruth ra ntang artepel aypwer-akngetyek. Boaz ran tawen-warl-anem alhek.

¹⁶ Ruth ra alpek apmer-warl-anem anherrikw

ikwerenh-warl. Naomi-elan ayerne, “Anherreyay! Nthakenhay?”

Ruth-el angka ilenh Boaz-akert, rarl mpwarek. ¹⁷ Rap angkek, “Nhenh araw, ntang akngerr! Ra atyeng anthe, rap angkek, ‘Ma! Nthakenh itepant-akert alpey-angenh anherrengkw-warl.’ ”

¹⁸ Naomi-elan tyerne, “Arternp-tangkwel mpwelhey. Boaz-el ra anamerl anwarnem-tangkwel. Rap alhem, artwamp-rnemek angketyek. Lyertant apek ra ngenh ilem.”

4

Boaz Ruth-itwel itengerreyel

¹ Ikwer-penhan Boaz ran alhek, keyt-itwel arrernelhetyek, rernemarl aylpenhem tawen-warl. Keyt ikwer-itwel rernem akarrerrenh, ilek-ilekek apmelerr angkayntetyek. Rarl ikwer-itwel arrernelhek, artwa ran apetyek, wetharl Boaz-el arrwekel itnewek. Ranap arelh inpert arntarnt-arey-angker anenharl. Boaz ikwer arlkek, “Atyeng apelyay! Apetyay! Atyeng-itwel anetyek.” Artwa ra apetyek, ikwer-itwel anetyek.

² Boaz-elan artwamp-rnem 10-anem inerl-apenh, rap angkek ikwer-rnem, “Apetyenh-arey! Aylek-itwel arrernelhetyek.” Rernemap aney-alhek-anem. Akngerr ingwer-rneman anenh arpemarl. ³ Boaz angkek artwa ikwer-warl, “Ntwa apek awek, Naomi rarl apey-alpek Moab-they? Inperterrenty-penh ra iterreyel, katen anewikw ikwerenh-kenh Elimelek-kenh tharlemeletyek.

Elimelek ra aylekenh-antey aneyel. ⁴ Ayengan iterrenh, ngkweng-warl angketyek. Aleyaym nga ilkelhem apek, katen yanh payemeleyek, artwamp-rnemel aweyelarl-kety. Ntwemernt payemelemer. Nganap apek iterreyel, mentyarl aretyek. Kel mwerr. Athanemarl payemeleyek.”

Artwa ingwerelan awek, rap angkek, “Ya, mwerr, atha payemelem.”

⁵ Boaz-el tyernek, “Ntwarl katen payemelem, ntwap inem arelh Ruth wethey, inpert yanh Moab-areny, Elimelek-kenh ahenterrikw. Nga itengerrem ikwer-itwel, ra away akely atnyenetyek, alerey Mahlon-kenh anetyek anwekantherrenh-angkwarr. Rarl alkenherreyenhel, rap apmer inetyek ikwer.”

⁶ Artwa ran angkek Boaz-ek, “Yew! Boaz, nga arraty angkeyel. Kel nthakenh ayeng Ruth-itwel itengerrey-angenh. Atha apmer payemelenty, aleraty atyenh-rnemel nthakenh iney-angenh, ayengarl ahaperrenty-penh. Kel nthakenh atha iney-angenh. Ntwantey inetyek!”

⁷⁻⁸ Alakenh angkenty-penh artwa ra pwet anyent lhelek, anthemel Boaz ikwer. Rap angkek, “Mwerr wenh ntwap apmer payemeleyek.” Alakenhap Israel-kenh-rnemelan mp-warenh. Rernem angkerrenh-tangkwel. Anyentelan pwet lhelenh, ingwer-warl-anem anthemel.

⁹ Boaz ranem angkek artwamp-rnemek ingwer-rnemek-then, “Kel arrantherr angetherrarl areyel, atharl apmer payemeleyel Naomi-they. Arrantherr iterl-areyel, apmer yanh

Elimelek-kenh-tangkwel, alerikw ikwerenh-atherr-then-kenh, Mahlon-then-kenh Kilion-then-kenh. ¹⁰ Arrantherrap areyel, atharl Mahlon-kenh anewikw ineyel arrpemar, Ruth wethey Moab-areny. Ayengan ikwer-itwel intengerrem-anem. Aylanth ampernem atnyenem apek, ampernem Mahlon ikwer. Kel mwerraw. Alakenhaym apmer nhenh-areny-rnemel renh iterl-aretyek, iylpelerrey-angenh.”

¹¹ Artwamp-rnemel ingwer-rnemel-then awek, rernemap angkek Boaz-ek, “Yew! Anantherran angetherr arek. Mwerr alakenhan. Anantherrap INGKART ayernem, arelh renh arntarnt-arayntetyek, rarl apmer ngwenh-itwel aney-alpetyek. Anantherr INGKART ayernem, renh anthetyek ampernem akngerr. Awank-akerr artwa arwekeleny Jacob ra Rachel-then Leah-then-itwel itengerrek, ratherrap ampa akngerr atnyenek. Alakenh. Arelh atherr-they anantherr Israel-wenh-rnem akngerrerek apmer nhenh-itwel. Ephrath-kenh-rnem ingkerrenhelan ngenh nakayntetyek. Bethlehem-areny-rnem ingkerrenhel ngenh iterl-aretyek. ¹² Alakenh-kety anantherr INGKART ayernem, mpwelanthenh ampa akngerr anthetyek. Anewart weth-atherr arrwekeleny-atherr-apeny, Tamar-then Judah-then-apeny. Ratherr alerikw anyent atnyenek itnan Perez, ngkwenh arrwekeleny. Aleyan akngerr-anem Perez-kenh-antey aneyel. Alakenhey.”

Ruth ra away akely atnyeneyel

¹³ Kel-anem Boaz-then Ruth-then itengerrek. INGKARTan athamerrenh Ruth ikwer. Ingwer-ingweran ra away akely atnyenek. ¹⁴ Arelh Bethlehem-areny-rneman angkek-anem Naomi ikwer-warl, "INGKART nakey anantherr ingkerr! Ran ngenh antheke away aperlengkw. Rarl alkenherrenty rap ngenh arntarnt-arem-anem. Israel-kenh-rnem ingkerrenhel renh iterl-areyenh. ¹⁵ Ngarl arelhampw irreyenhel, ra ngenh irrngerney-antheyenh, ngenh rlterrkelemel. Anherrengkw ngkwenhan artewenty ngkweng ilkelheyel, anperarl ingwer-rnem-angkwarran. Arelhampw anyentelan ampa irrwey 7 atnyenem apek, renh arntarnt-arayntetyek. Anherrengkwel ranap ngenh amentarrp athamerremel arntarnt-arenh arlengew-alenty. Aleyan ra aperlengkw ngkwenh-anem atnyenek."

¹⁶ Naomi-elan away renh inek, rap iytnwel-anem atnyenek, renhap arntarnt-arem. ¹⁷ Arelh Bethlehem-areny-rnemel renh itnewek *Obed*, rernemap angkek, "Awey akely renh Naomi-ek atnyenek!"

Ingwer-ingweran *Obed* ra away akely atnyenek itnan *Jesse*. *Jesse* ran away akely atnyenek itnan *David*-anem.

*Atyetyart David-kenh-antey-rnem
alakenh aynteyel*

¹⁸ Perez-kenh-rnem alakenh aynteyel:

Perez-an aynikw Hezron-kenh anek,

¹⁹ Hezron-an aynikw Ram-kenh anek,

Ram-an aynikw Amminadab-kenh anek,

²⁰ Amminadab-an aynikw Nahshon-kenh anak,
Nahshon-an aynikw Salmon-kenh anak,
²¹ Salmon-an aynikw Boaz-kenh anak,
Boaz-an aynikw Obed-kenh anak,
²² Obed-an aynikw Jesse-kenh anak,
Jesse-an aynikw Atyetyart David-kenh anak.

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 9 Mar 2024 from source files dated 10 Nov 2023

284d4e02-292d-5bd8-a8a6-8360a307b937